

**Joseph d'Arbaud**

# **La Sòuvagino**



**C.I.E.L. d'Oc**

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

## BOUAH-HOU

Fasié un parèu le jour, Ziri l'estournèu s'èro agandi, eilalin, dóu coustat d'Aut emé touto la chourmo, à l'acoustumalo, pèr veni, vendèmio coumplido, rapuga dins li vigno dóu Bas Lengadò e li Mas d'Arle. E, tant lèu pausa uno idèio le l'estirado, s'èro leva dóu mouloun emé quàuqui cambarado (vau bèn mai, pièi, pèr li cassaire) e, s'estènt leissa pourta en bas, eilalin, de vers lis estang, avié feni pèr li planta tóuti. Mai, dins la darriero vigno monte avien pica, en vesènt parèisse un oumenas que cercavo le cengloun, lis estournèu enaura, en s'aubourant, aguèron bèu à souna: "Ziri, Ziri, Ziri", basto! aguè esquiha.

Car, à pichot saut, en arrivant sus la raro, aqui monte li faturo mancon e que naisson li salanc, Ziri s'èro abriva en leissant lis autre e tiravo en bas emai en bas, de-longo, vers un rode, eila, qu'èu sabié. En voulant, prenié sis amiro e recouneissié lou païs: eici, uno roubino aboulido e, alin, uno listo de palun emai, pereïabas, de risiero. E, pus liuen encaro, au mitan di sansouiro rabinado ounte, à role, flourejo la sau, quàuqui gacholo retorto, qu'à ras lis aigo, uno grosso aubo ramado, en li douminant, s'eissié.

Quiha à la cimo de l'autras, Ziri, en s'aliscant lou plumage, gai de se vèire rendu, s'espoumpissié. A-n-aquest role d'aqui, ié disien li Gràndi Cabano e, chasque an, entre abourda li bèu relarg dóu Miejour, Ziri s'envoulavo pèr ana faire vesito à soun grand coulègo. En bas, au pèd de l'aubre, aro, Ziri regardavo lusi un cuvert de sagno que couneissié proun e, lins sa fino ausilo d'estournèu, destriavo, souto vènt, un dindin le sounaio escampihado.

— Soun alin, faguè Ziri.